



Kushambuliwa na Majaribu Makali Kabisa

Na kwa kuwa mwenyewe aliteswa alipojaribiwa, aweza kuwasaidia wao wanaojaribiwa.—**Waebrania 2:18.**

Ikiwa, katika mazingira yenye jaribu kali mno, watu wenye uwezo wa kiroho, wakishinikizwa kuliko kiasi, na kukata tamaa na kuvunjika moyo, ikiwa katika wakati fulani hawataona chochote kinachovutia katika maisha, ili wapate kukichagua, hili sio jambo geni au jipya. Hebu hao wote wakumbuke kwamba mmoja kati ya manabii wakuu kabisa alikimbia kuokoa maisha yake kutokana na hasira ya mwanamke aliyekasirishwa. Akiwa katika hali ya ukimbizi, uchovu na kuchakazwa na safari, hali ya uchungu wa kuvunjika matumaini ikivunja nguvu ya moyo wake, aliomba afe. Lakini ni katika wakati huu ambapo matumaini yalikuwa yametoweka na kazi ya maisha ilionekana kutishiwa kwa hali ya kushindwa, ndipo alipojifunza moja ya mafundisho yenye thamani sana maishani mwake. Katika saa ya udhaifu wake mkubwa kabisa alijifunza hitaji na uwezekano wa kumtumainia Mungu akiwa katika mazingira ya kutisha kabisa.

Wale ambao, huku wakitumia nguvu za maisha yao katika kazi ya kujinyima nafsi, wanajaribiwa kukubali hali ya kukata tamaa na kukosa imani wanaweza kupata ujasiri kutokana na uzoefu wa Eliya. Uangalizi wa Mungu wenye hadhari, upendo Wake, nguvu Yake, unaonekana hususan kwa niaba ya watumishi Wake ambao nia yao imeeleweka vibaya au haikuthaminiwa, ambao ushauri wao na makemeo yao yamedharauliwa, na ambao jitihada zao zinazoelekea katika matengenezo zinalipwa kwa chuki na upinzani.

Ni katika wakati huu wa udhaifu mkubwa zaidi ambapo Shetani hushambulia nafsi kwa majaribu makali zaidi. Ni kwa namna hiyo ndivyo alivyotarajia kushinda dhidi ya Mwana wa Mungu; kwani kwa sera ya namna hii alikuwa amepata ushindi mwingi dhidi ya mwanadamu. Wakati utashi unapodhoofishwa na imani inaposhindwa, ndipo wale waliowahi kusimama imara na kwa muda mrefu kwa ajili ya haki wanashindwa katika jaribu. Musa, akiwa amechoshwa kwa miaka 40 ya kutangatanga na hali ya kutokuamini, japo kwa muda mfupi alishindwa kushikilia Nguvu Isiyopimika. Alishindwa pale tu katika mipaka ya Nchi ya Ahadi. Vivyo hivyo ndivyo ilivyokuwa kwa Eliya. Yeye aliyekuwa amedumisha imani yake kwa Yehova katika miaka ya ukame na njaa. Yeye aliyekuwa amesimama bila kutishika mbele ya Ahabu, yeye ambaye wakati wote wa siku ile ya jaribio pale Karmeli alikuwa amesimama mbele za taifa lote la Israeli akiwa shahidi pekee wa Mungu wa kweli, katika saa ya uchovu aliruhusu hofu ya kifo kuishinda imani yake katika Mungu. Vivyo hivyo ndivyo ilivyo leo...

Wale ambao, wakisimama katika mstari wa mbele wa pambano, wanahimizwa na Roho Mtakatifu kufanya kazi maalum mara kwa mara watajisikia kuwa na mjibizo wakati shinikizo linapoondolewa. Kukata tamaa kunaweza kutikisa imani ya kishujaa sana na kudhoofisha nia iliyo thabiti zaidi. Lakini Mungu anaelewa, Naye bado anaonesha huruma na upendo. Yeye anasoma nia na makusudio ya moyo...Mbingu haitawaangusha katika siku ya taabu yao. Hakuna kinachojiona kutoweza kujisaidia kabisa, lakini wakati huo huo kutokushindikana, kuliko nafsi inayohisi hali yake ya utupu na kumtegemea Mungu kikamilifu (Prophets and Kings, 173-175).